

## PEM THEI LAWH

**Ruatfela Nu**

Hmasawna dik leh tlo/daihrei (sustainable development) chu “vawiina hmalakna eng pawh hian, thangthar chhuan lo la awm zel turte nun khawchhuahna a khawih pawh tur a ni lo a, an dam khawchhuahna kawngah a tanpui zawk tur a ni” tih hi a lungphum a ni a. Tuna Mizorama hmasawna hnathawhte hi chu hmasawna khingbai leh kebai a ni a, thangthar chhuan lo la awm zel turte hmakhua chu sawi loha lum, tun chhuan ngeite'n kan tuar nghal a nih hi. Ramngaw leh nungcha a tichereuin an ti chimit a. Tuihna leh tui tawmbuk a tichhia a, kan chhiat pui mek reng a ni. Sustainable development an mausam chhan hi thangthar chhuan lo la awm turte tana he ram hi chenna tlak a nih an hlau em ni tih hial tur a ni.

Kan ram hruaitute hmasawna hriat ve hi chu Mizo upain ‘Pem thei lawh’ an sawi ang mai a ni. Hmanlai Mizo khawtlang nunah an chenna khua atanga khaw danga pem an ching a. Pem tur chuan an huan thlai leh theite dimdawina nei miah loin, hel leh a sen nen an lo bawrh bawrh a, a zarte pawh an thliak/kuai bal hlawn hlawn thin. Chutianga thei leh thlai lawh chu a rem nghal vek a, a kung pawhin a tuar thin. Kan ram hi pem san tum ang maiin kan suasam tihna a ni.

He hmasawna khingbai vang hian khaw tam takin tui thinghlim in tur an tlakchham pah a, hmasawna khingbaiin an tui lakna tuidawt a tih chhiat sak vang te, an tui lakna lui lei vungin a chhilh vangte a ni tlangpui a. Environment tluksawp vanga tuihna kangchat hrim hrim vang pawh a ni bawh. Khaw thenkhata tui harsatna hi hmasawna khingbai vanga a ni tih Chiang taka lan avangin, mipuiin hmasawna kawngpui zaupui pui aiin tuihna a pawimawh zawk tih an hriat pah mek a ni.

Mipui hian kawngpui tha an duh lo tak tak a ni lo. Kawngpui tha neiha tui thianghlim in tur neiha loh ai chuan tui thianghlim in tur neiha kawngpui tha neiha loh an duh zawk tihna a ni. Tui tel loin karkhat pawh a dam theih loh a, kawngpui tha nei lo pawhin a dam khawchhuah theih tho tih hi harsatnain minrawn hriat tir ta a ni.

Mizoram hmar lama khaw chhuanawm tak, Tinghmun khawtlang pa fing rualin ‘Khelmual aiah Tui’ an ti a, chu chu ‘hmasawna tluangtling leh daih rei tihna pawh a ni thei awm e, an thalaite infiamna mualah tui an khuap a, a tirah chuan huat leh sawisel an hlawn nasa! Mahse tunah chuan khatih laia Tinghmun khawtlang hruaitute chu hmahlir thui, mi fing rual tih niin Zoram khawvel hian kan ngaisang a, an khaw thalaite pawhin an ngaisang tawh ngei ang.